

## 合神心意的敬拜

經文：撒母耳下 7:1-14a；約翰福音 4:19-24

7-23-06

今 á 日 ê 頭一段經文是大衛王想 beh 起造上帝聖殿 ê 記事。大衛坐位 40 冬，前 7 冬半 Kan-ta<sup>n</sup> 統治十二個支派中 ê 一個，伊 tùi 耶布斯人手中奪回耶路撒冷(5:6)，建立以色列王國，定作首都，然後 kā 約櫃移到耶路撒冷(5:5ff)。大衛認為國家 ê 財富應當奉獻 hō 上帝，為伊起造聖殿，總是上帝真明確 ka 伊拒絕，因為伊手流濟濟人 ê 血。(歷上 22:8)。上帝愛一個和平 ê 人來起造伊 ê 厝，chit-ê 任務就落佇大衛 ê kiá<sup>n</sup> 所羅門身上。雖罔上帝 m̄ hō 大衛起殿，卻鑑納伊 ê 心意，kap 伊同在，tī 伊 ê 面前剿滅一切對敵，堅固伊 ê 王位直到永遠 (歷上 17:8)。Tùi hit 時大衛就 kā 精神用來治理以色列，伊對內行公義，設立制度，對外 phah 倒四周圍 ê 敵人。歷上 18:6 講：『大衛無論 toh 落去，耶和華 lóng hō 伊得勝。』這正是以色列人對君王 ê 期待 (撒上 8:19-20)。到今 á 日以色列人猶原非常懷念大衛 ê 統治，所以就用大衛 ê 星作國旗。

大衛帶領以色列穩定發展了後，伊無顧家己 ê 享受，伊知影國度 ê 根基佇上帝，tùi án-ne 開始預備起聖殿，伊 m̄-nā 盡伊 ê 力量預備材料，kok 深深體會敬拜上帝毋是 tī 豪華 ê 殿，需要制定完善 ê 敬拜禮儀，為著建立百姓 ê 信仰，伊盡心安排利未人 ê 職位 kap 服事制度，又成立樂團、聖歌隊 kap 建立各項事奉規章等。大衛 kā 上帝 ê 計劃當作家己 ê 目標，伊真清楚家己 ê 職責，一世人歡喜遵趁上帝 kap 嘔啉上帝。可見，敬拜上帝 m̄-na 是參加聚會，做好家己 ê 工作 mà 是敬拜上帝，咱 thang tùi 日常生活中間做起，kā 敬拜上帝當作追求得勝 ê 事業，kā 上帝 ê 旨意 khng tī 咱事業 ê 頭一位，m̄-na 追求工作 ê 成就感，mà ài 有佇工作上為主做見證 ê 目標，這 chiah 是上帝所歡喜 ê。親像俊育長老翻譯聖經、字典、寫冊、作網站、甚至組織布袋戲團向熱愛台灣文化 ê 非基督徒傳福音。Iáu 有賴長老製作 ê 中文圖書分類法，成做世界中文編目的教科書以外，伊對台灣教會歷史真有把握，是台灣教會史 ê 活字典，伊寫 5 本教會史話、一寡荷蘭時期 kap 南明歷史 ê 著作，現在已經 84 歲 ê 高齡猶原繼續佇網路上面寫文講古。In 攏是胸懷天國 ê 基督精兵，是上帝 ê 好同工，mà 是咱要學習 ê 對象。

這 2-3 冬來長執會一直佇計畫 sóa 堂，mà 有佇注意是 m̄ 是有教會 beh 俗賣，總是 jú 往 Boston 方向地價 jú 貴，並 m̄ 是咱 ē-tàng 承受 ê。想 beh 搬 sóa 是因為拜堂老 ah，濟濟所在落漆、漏水、椅子 mà 搖搖欲倒；一方面 mà 考慮著學青聚會 ê 方便，總是學青有車 ê 人 jú 來 jú 多，聚會無問題，反轉因為咱想 beh sóa 拜堂，濟濟事工 lóng 無法度進行。現在長執有共識認為教會應加強宣教 kap 慈善事工，所以決定整修咱 ê 教會，因為教會是上帝 ê 厝，雖罔毋免裝潢 ka 真 súi，總是 mà 未使相馬虎至少要堅固舒適。目前咱教會猶原會留佇 Framingham，重新定位作宣教 kap 好撒馬利亞人 ê 教會，就是咱要實行耶穌交託咱 ê 大使命，而且學習並實踐耶穌對人類 ê 疼。頂禮拜六李牧師提起韓國教會 ê 興起，真大 ê 原因歸功勞 tī 海外宣教師無私 ê 付出，In 感受著上帝 ê 恩典，現在韓國 mà 派出 15000 名宣教師佇世界各位傳福音。今 á 日我 ē-tàng 站佇 chia 宣講上帝 ê 道理 mà 是因為早期宣教師佇台灣 ê 宣教 kap 犧牲奉獻 ê 結果。

第二段經文無仔 lectionary 內底，選 Chiah 段經文是因爲耶穌 kap 撒馬利亞婦人談著按怎敬拜上帝。仔主前 720 年，亞述皇帝攻陷撒馬利亞，kā 當地 ê 人遷 sóa 到亞述(王下 17:6)，然後將異族遷 sóa 到撒瑪利亞，kap 當地 ê 猶太人通婚，In ê 後裔就是撒馬利亞人，血統，文化攏混雜 lah。猶太人因種族、傳統 ê 緣故認爲 In 無清氣，就歧視 In。

猶太人 tùi 耶路撒冷 beh 去加利利，經過撒馬利亞尙近，In 寧可行遠路 mà 不要經過撒馬利亞。耶穌 phah 破種族 ê 歧視，來到撒馬利亞仔古井邊歇暍 kap 撒馬利亞婦女談道理，煞改變這 ê 婦女 ê 生命。仔 4:20 撒馬利亞婦人提起 ê 山，叫作基利心，當年撒馬利亞人仔基利心山頂起聖殿，守逾越節，獻祭，來對抗耶路撒冷 ê 聖殿。耶穌時代聖殿已經毀壞，總是撒馬利亞人 iáu 仔附近禮拜，有獻祭，有節慶，總是有嘴無心，禮拜已經變質，獻祭是輸人不輸陣 ê 面子問題，beh kap 耶路撒冷「拚」。所以耶穌講敬拜 ê 重點唔是仔獻祭或是地點，是仔上帝 ê 憐憫，猶太人用潔淨 ê 問題來排斥 In，耶穌卻指出清氣唔是外在，是內心 ê 問題。敬拜 ê 目的，唔是爲著責任或是外在 ê 形式，是爲著每一 ê 需要救贖 ê 心靈。耶穌 kā 伊講無 koh 有不受憐憫 ê 信息，婦人內心對 chia 產生真正 ê 敬拜，煞爲當地帶來屬靈 ê 復興，v. 41 講有濟濟人因耶穌 ê 信息信了伊。這 mà 是咱教會現在面對 ê 問題，只要清楚敬拜 ê 意義，就免受 sóa 堂 ê 想法所約束 lah。耶穌講互上帝歡喜 ê 敬拜，唔是傳統、唔是時間、mà 唔是儀式(4:20-21)。仔任何環境下面攏 ē-tàng 敬拜上帝，唔是講免來教會，只要用心靈 kap 誠實祈禱著好，橫直現在電視禮拜或是網路禮拜攏真方便。這是對敬拜 ê 誤解，敬拜真多樣，包括：祈禱、讀經、頌歌、認罪、嘔啞、信息、奉獻、洗禮、聖餐 kap 聖徒相通。Nā 是透過電視、收音機或是網路禮拜 Kan-ta<sup>n</sup>算是靈修 nā-tiā<sup>n</sup>，所以我常常鼓勵學青設使只 ē-tàng 仔團契 kap 敬拜選一工 ê 時，寧可選敬拜，因爲團契 kap 聖徒相通只是敬拜 ê 一項。有形教會 ê 敬拜功能，iáu 是 bōe-tàng 取代 ê，尤其是兄姊之間 ê 關懷互動。分享是教會存在 ê 使命 kap 指標，咱有份享受基督 ê 生命，mà ài kap 人分享咱 ê 生命，包括真理 kap 恩典。真理需要 kap 人分享，透過聖神 ê 幫助教示人仔墮落 ê 世界 ài 怎樣堅持公義 kap 正直；恩典 ê 分享是 ài 建立一個爭取服事別人 ê 群體，mà 是教會 hō 世界 siōng 好 ê 禮物。教會按怎互世界成做真正顯明天父 ê 所在？台灣有一句俗語講：食好鬥相報，這是咱宣教責任 ê 所在。當教會有實際 ê 關懷行動，上帝 chiah 真正住仔咱 ê 中間，箴 19:17 講：憐憫 sòng-hiong 人 ê，就是借互耶和華；伊 beh 照伊所行 ê 好事來還伊。所以傳揚福音、去除散赤、找尋和平攏是教會服事基督 ê 本分。

每 ê 世代，咱攏會看仔有人 beh 更新教會，爲著跟著時代 ê 潮流，各教會不斷地改進，有傳統禮儀、有敬拜讚美；mà 有節目導向或目標導向 ê 教會形態，iáu 有細胞小組等等真濟款。M̄-koh 敬拜 ê 主體是上帝，敬拜既然是上帝設立，ài 咱來敬拜伊，án-ne 就唔是「咱歡喜 ài 按怎敬拜上帝」，應該是「上帝 ài 咱按怎敬拜伊！」耶穌 kā 咱講 ài tùi 內心出發，用靈 kap 誠實配合實際 ê 行動來 ho 上帝歡喜，其實守律法簡單，凡事疼人就困難濟 ah；納稅簡單，服事散赤就 khah 困難。慕迪講：「一百個人裡面，Kan-ta<sup>n</sup>一個人會看聖經，卻有 99 個人 teh 看基督徒。」ng 望咱教會 ē-tàng 繼續以行動遵趁基督疼 ê 誠命，成做一 ê 真理 kap 恩典滿滿 ê 所在。